



*Selasa, 28 Pebruari 2023*

**Ogen: Matius 19:6**



*“Dibata Si Mpersadasa”*



**P**erjabun eme sada persadan si luar biasa. Umumna kalak erjabu ibenaken ibas palas keleng ate, singenan, sada arih dengen iakap cocok kal jadi teman ndalani kegeluhen. Emaka genduari la sitik belas-belas, teman asa metua. Desken lagu pop Karo `..temani aku asa metua..` Ertina, sanga rupa lanai bagi sigel-gel jile ras ngudana, kula enggo metua, gegeh reh kurangna ras sidebanna, tetap jadi teman, sitatangen, sikelengen, siapul-apulen. La bias keleng ate tapi arus ikuhi alu kesetian sada ras sidebanna. EMaka enda me perpadanen si luar biasa ibas manusia, ija ibas kerina paksa nggit ras ngasup ngaloken sada ras sidebanna, ibas kerina paksa. Tanpa sarat. Seh Dibata nirangkenca alu kematen.

Kerina enda la terjeng pengakun ras ipalasi ngena ate ntah pe ikataken `cinta sejati`, tapi kerinana iakuken ibas kiniteken. Maka Dibata me simpersdaken kalak si ersada arih guna mbangun `komitmen ibas jabu`. Bageme ikataken Jesus man kalak si Parisi si ersura-sura ncubai Jesus kerna perjabun. Ibas kerina percuban si ialoken Jesus, IA tetap njababsa erpalasken Pustaka Si Badia. Erpalasken e maka ibahanNa sada pernyataan si jadi palas ras pengajaren man kalak sitek `emaka lanai bo ia dua, tapi sada. Dage si enggo ipersadaken Dibata la banci isirangken manusia.

Enda me si jadi gelementa moria. Ipersingeti kita gelah ula kal sibenaken cari masalah subuk ibas jabuta ras jabu anakta, temanta ras sidebanna. Gelah la jadi benih `persirangen`. Radu ras kita njagai jabu ibas kerina si la uli gelah sura-sura Dibata ibas jabu e banci ijaga ras tersehi.